

REGLUGERÐ UM FLOKKAKEPPNI BTÍ

1. gr.

Keppnisfyrirkomulag.

Keppt skal eftir 3ja manna „ólympísku liðakerfi“ með tvíliðaleik í 1. og 2. deild karla. Í unglunga- og kvennaflokki skal keppt eftir tveggja manna "Corbillion" kerfi. Frá og með 1. september 2018 skal einnig keppt með 3ja manna ólympísku liðakerfi í 1. deild kvenna.

Í 1. og 2. deild karla og kvenna telst efsta lið eftir deildakeppni „deildarmeistari“, en í öðrum deildum teljast sigurlið „Íslandsmeistarar“. Sigurlið í úrslitakeppni 1. deildar telst Íslandsmeistari (sjá 12. grein).

Röð leikja skal vera þessi.

□ „Ólympískt liðakerfi“:

- A:X , B:Y
- Fimm mínútna hlé þar sem liðsstjóri/þjálfari velur tvíliðaleikspár.
- C ásamt A eða B:Z ásamt X eða Y
- A eða B:Z (sá af A og B sem ekki keppti í tvíliðaleik keppir)
- C:X eða Y (sá af X og Y sem ekki keppti í tvíliðaleik keppir)

□ „Corbillion kerfi“, 2ja manna:

- A:X , B:Y,
- tvíliðaleikur,
- A:Y, B:X

Ef þátttakendum í flokki hefur verið skipt í tvo riðla skal í úrslitakeppni spilað „í kross“ þannig að sigurvegari í A-riðli leikur við lið í öðru sæti í B-riðli, en sigurvegari í B-riðli leikur við lið úr öðru sæti úr A-riðli. Sigurvegarar úr þessum leikjum leika til úrslita, en þeir sem tapa leika um þriðja sætið.

2. gr.

Keppnisflokkar.

Keppnisflokkar í flokkakeppni BTÍ eru:

1. deild karla
1. deild kvenna
2. deild karla
2. deild kvenna (ef næg þátttaka er)

Unglingar 16-18 ára
Unglingar 14-15 ára
Ungl. 13 ára og yngri

Í 1. deild karla og kvenna skulu vera allt að 6 lið. Þó er heimilt að 7 lið leiki í 1. deild kvenna ef það er nákvæmur fjöldi þeirra liða sem skráir sig til leiks.

Skrái 8 eða fleiri lið sig til leiks í 1. deild kvenna skal 2. deild kvenna stofnuð og skulu þá sömu reglur fara um hana og 2. deild karla. Á fyrsta leikári 2. deildar kvenna skal liðum ráðað jafnt í deildir og skal meðalstigafjöldi leikmanna liðs á styrkleikalistanum ráða því í hvorri deildinni liðið tekur þátt.

Neðsta liðið í 1. deild karla fellur í 2. deild en efsta lið í 2. deild flyst í 1. deild.

Leikin skal tvöföld umferð í 1. og 2. deild karla og kvenna en einföld umferð í öðrum flokkum.

Í 1. og 2. deild karla og í kvennaflokki skal lágmarksstærð keppnisvallar vera 5 x 10 m. og keppni hvorrar deildar skal fara fram á einu til þremur borðum eftir því sem húsrúm leyfir. Í öðrum flokkum ákveður mótanefnd fjölda borða sem keppt skal á.

Heimilt er í samráði við mótanefnd BTÍ að stofna til utandeildar. Keppni í slíkri deild hefur vægið 1 samkvæmt reglugerð um styrkleikalista. Úrslit í utandeild skulu tilkynnt mótanefnd innan þriggja sólarhringa frá keppni.

3. gr.

Fyrirkomulag keppni.

Flokkakeppni skal fara fram með einhverjum af eftirfarandi hætti:

1. á fyrri hluta árs á einni helgi,
2. leikin heima og heiman á æfingatímum félaganna eða
3. leikin í umferðum um helgar í aðstöðu félaga í deildinni þar sem fram fara ein eða tvær umferðir í senn.

Fer fyrirkomulag á þessu eftir ákvörðun mótanefndar BTÍ í lok hvers sumars.

4. gr.

Mótanefnd framkvæmdaaðili.

Mótanefnd sér um framkvæmd flokkakeppninnar í samráði við aðildarfélög BTÍ. Félag sem halda viðureignir eða keppnisdaga 1. og 2. deildar tilnefna yfirdómara, og skulu þeir fá greitt fyrir dómgæslu, í samræmi við innheimt keppnisgjöld. Mótanefnd BTÍ útvegar kúlur til keppni. Aðrir dómara í 1. og 2. deild eru á ábyrgð þess félags sem mót eða umferð heldur og skal félagið leitast við að útvega einn dómara á hvern keppnisvöll.

Mótanefnd veitir verðlaun til þeirra leikmanna verðlaunaliða sem hafa spilað eina umferð með liði sínu.

5. gr.

Viðurlög við brotum o.fl.

Mæti lið ekki til leiks telst það lið hafa tapað leiknum með mesta mun og skal félag það sem lið er úr greiða ákveðna sekt, sem mótanefnd ákveður. Mótanefnd er heimilt að fresta eða flýta leikjum ef brýna nauðsyn ber til. Félagið er einnig skyldugt til að greiða sannanlegan kostnað sem stofnað hefur verið til vegna keppninnar.

Sé leikin tvöföld umferð, heima og heiman, í mótinu skal hið brotlega lið leika seinni leikinn á útivelli (sé hann óleikinn). Komi slíkt fyrir aftur skal liðið og fastir leikmenn þess vera úr keppninni, leiknir leikir þess strikaðir út og félagið dæmt til að greiða ákveðna sekt til mótanefndar. Lið telst mætt til leiks séu 2/3 leikmanna mættir.

Tefli lið fram leikmanni sem ekki er heimilt að keppa leik (t.d. þar sem hann telst ekki réttilega skráður í liðið eða þar sem hann hefur þegar leikið hámarksfjölda leikja sinna í viðkomandi umferð) skal liðið tapa viðkomandi leik með mesta mun.

6. gr.

Um úrslit leikja.

Unninn leikur gefur tvö stig en hvort lið fær 1 stig ef jafntefli verður. Sá vinnur mótíð sem flest stig hlýtur og verði lið jöfn ræður hlutfall unninna leikja og tapaðra og síðan ræður hlutfall unninna lota og tapaðra. Allir leikir keppninnar skulu reiknaðir með. Sé þá enn jafnt hjá tveimur eða fleirum liðum skal leikið til úrslita á hlutlausum velli.

Heimalið er ábyrgt fyrir því að úrslit leiks berist til mótanefndar BTÍ en skil geta verið með rafrænum hætti, og skulu öll úrslit einstakra leikja með fullum nöfnum keppenda og undirrituðum leikskýrslum berast innan 3ja daga frá lokum leiks.

7. gr.

Um hlutgengi leikmanna.

Konu er heimil þátttaka í flokkakeppni karla.

Í liðakeppni 1. og 2. deildar mega eingöngu leika þeir leikmenn sem hafa löglega verið skráðir í liðið sbr. 1. mgr. 8. gr.

Aðeins á tímabilinu 15. desember til 4. janúar er leikmanni heimilt að skipt um lið í liðakeppni 1. og 2. deildar. Mótanefnd BTÍ skal tilkynnt um liðaskipti á framangreindu tímabili og er sú tilkynning óafturkallanleg.

Ekki mega fleiri færast úr ákveðnu liði og yfir í annað eða önnur lið í framangreindum leikmannaskiptaglugga, en helmingur þeirra leikmanna sem leikið hefur fyrir liðið á haustönn.

Dæmi um þetta væri lið þar sem fimm leikmenn eru skráðir til leiks og fjórir hafa leikið á haustönn. Þá mega í mesta lagi tveir leikmannanna færa sig úr liðinu og í önnur lið. Ef allir leikmennirnir fimm hefðu spilað þá væri fjöldinn enn tveir leikmenn sem mega færa sig úr liðinu, þar sem þrír væri meira en helmingur.

8. gr.

Um tilkynningaskyldu félaga, gjöld vegna keppni og röðun leikja.

Félögum er skylt að tilkynna mótanefnd BTÍ fyrir upphaf flokkakeppni skriflega hvaða leikmenn skipi hvert og eitt lið sem þátt tekur í keppni. Fjöldi skráðra varamanna í hvert lið er ótakmarkaður.

Keppnisgjald fyrir hvert og eitt lið í 1. og 2. deild er kr. 10.000,- sem ekki fæst endurgreitt þótt lið dragi sig úr keppni. Keppnisgjöld stafa af kostnaði við dómgæslu.

Einstök lið geta ekki hafið keppni í deild fyrr en liðið hefur verið tilkynnt mótanefnd og keppnisgjald greitt. Lið sem ekki hefur verið greitt fyrir, fyrir upphaf keppni, tapar sínum fyrsta leik með mesta mögulega mun. Hafi ekki verið greitt fyrir liðið fyrir næsta leik þess mun hann fara eins, o.s.frv.

Leikir liða úr sama félagi skulu fara fram fyrst í hvorum hluta keppinnar.

9. gr.

Mótanefnd raðar leikjum.

Mótanefnd raðar leikjum keppinnar og birtir á vefsíðu BTÍ fyrir fyrsta leikdag.

10. gr.

Viðurlög við að hætta leik.

Neiti lið að spila leik telst leikurinn liðinu tapaður. Neiti einstakur leikmaður liðs að spila leik telst sá leikur honum tapaður.

11. gr.

Viðurlög við að mæta ekki til leiks á réttum tíma.

Sé lið ekki tilbúið til leiks í síðasta lagi 15 mín. eftir auglýstan tíma getur hitt liðið krafist vinnings án leiks. Sé leikmaður ekki tilbúinn til leiks 5 mínútum eftir að honum kemur getur andstæðingur hans krafist vinnings án leiks. Lögmaet frávik frá tímamörkum þeim sem getur í síðustu grein teljast þau ein sem hljóttast af notkun samgöngutækja sem hafa fasta áætlun, enda beri keppendur enga ábyrgð á töfinni sjálfir og geti sannað töfina skriflega. Heimilt er að taka tillit til ófærðar eða annarra óviðráðanlegra aðstæðna innan skynsamlegra marka.

12. gr. **Úrslitakeppni**

Úrslitakeppni 1. deildar karla og kvenna fer fram eftir að deildarkeppni í 1. deild er lokið. Í undanúrslitum úrslitakeppni 1. deildar karla skulu annars vegar mætast lið nr.1 og lið nr. 4 í deildinni, og skal lið nr.1 hafa heimaleik í fyrsta og þriðja leik, en lið nr. 4. í öðrum leik, og hins vegar lið nr. 2 og lið nr. 3, og skal lið nr. 2 hafa heimaleik í fyrsta og þriðja leik, en lið nr. 3 í öðrum leik. Þau lið sem fyrir sigra í tveimur leikjum, komast áfram í úrslitaviðureign og skal það lið sem var ofar í deildinni hafa heimaleik í fyrsta og þriðja leik. Það lið sem fyrir sigrar í tveimur leikjum úrslitanna telst Íslandsmeistari í 1. deild karla í borðtennis.

Ef 6 lið eða fleiri leika í 1. deild kvenna skal úrslitakeppni 1. deildar kvenna fara fram með sama sniði og úrslitakeppni 1. deildar karla. Að öðrum kosti fara eingöngu tvö lið í 1. deild kvenna í úrslitakeppni. Þá skulu mætast lið nr. 1 og lið nr. 2 í deildakeppninni og skal lið nr. 1 hafa heimaleik í 1. og 3. leik en lið 2 í 2. leik. Það lið sem sigrar fyrir í tveimur leikjum telst Íslandsmeistari í 1. deild kvenna.

Það lið sem endar í 5. sæti í 1. deild karla skal spila eina viðureign við það lið sem lendir í 2. sæti í 2. deild karla á þeim tíma sem mótanefnd ákveður. Mótanefnd skal varpa hlutkesti til ákvörðunar um það hvort liðið skal eiga heimavöll. Það lið sem sigrar fær keppnisrétt í 1. deild karla á næsta keppnistímabili og það lið sem tapar leikur í 2. deild á næsta keppnistímabili.

Keppnistímabilið 2018-2019 verður úrslitakeppni 1. deildar karla og kvenna spiluð með þeim hætti að tveir deildarleikir (í stað tveggja til þriggja deildarleikja áður), leiknir sama daginn eða sömu helgina, ráða úrslitum um það hvaða lið kemst í úrslitaviðureignina. Sé ljóst áður en seinni deildarviðureigninni lýkur hvort liðið ber sigur af hólmi, skal keppni hætt þegar viðkomandi leik lýkur (t.d. ef fyrri deildarleiknum lauk 3-0 og liðið sem vann þann leik er komið í stöðuna 1-0 í næsta deildarleik).

Sjálft úrslitaviðureignin verður aðeins einn deildarleikur, spilaður á laugardegi, og verða þá úrslit í 1. deild karla, kvenna og 2. deild karla leikin sama daginn.

13. gr. **Frestun leikja**

Óski lið eftir frestun á viðureign í Íslandsmóti liða skal skrifleg beiðni þar um send mótanefnd með tölvupósti með minnst 7 sólarhringa fyrirvara, nema veigamiklar ástæður réttlæti annað.

Veigamiklar ástæður eru:

1. Samgönguferfiðleikar vegna veðurs.
2. Veikindi.
3. Leikmaður/leikmenn eru fjarverandi á vegum BTÍ.

Mótanefnd úrskurðar um fresti án tafar og tilkynnir fyrirliðum viðkomandi liða, svo og öðrum þeim sem málið kann að varða. Mótanefnd ákveður svo hvenær leika skuli hinn frestaða leik og tilkynnir viðkomandi liðum. Lið það sem sækir um frestunina ber allan þann kostnað sem af frestuninni kann að leiða.

Leitast skal við að hinn frestaði leikur sé leikinn fyrir næstu umferð. Ef leikurinn hefur ekki farið fram innan 4 vikna frá upphaflegum leikdegi skal leikurinn settur á ákveðna dagsetningu af mótanefnd. Ekki er hægt að biðja um frestun á þeim leikdegi. Ef frestun er vegna veikinda skal hún ákveðin og tilkynnt eigi síðar en kl. 12:00 á leikdegi.

Ef lið fær frestun á leik má það aðeins nota þá leikmenn sem löglegir voru með liðinu þegar leikurinn átti upphaflega að fara fram.

Mótanefnd getur veitt samþykki á breyttum leikdegi ef bæði lið eru því samþykkt og hafa fundið nýjan leikdag annað hvort fyrir áætlaðan leikdag eða eftir og minnst 3 sólarhringa fyrirvara.

14. gr. Gildistaka.

Reglugerð þessi öðlast gildi frá og með 1. júlí 2017 og falla eldri reglugerðir um flokkamót BTÍ þar með úr gildi. Samþykkt á stjórnarfundum BTÍ þann 12. desember 2016. -Vissar greinar reglugerðarinnar voru endurskoðaðar fyrir 10. september 2017 að teknu tilliti til ábendinga. Frekari breytingar gerðar í september 2018, sbr. einnig frétt á heimasíðu BTÍ í desember 2017.